

Tetun

PM timoroan husu realizmu iha planeamentu ba Orsamentu Estadu 2017 nian

16 de Maio de 2016, 12:35

Primeiru-ministru timoroan iha ohin apela atu polítiku no burokrata sira iha nasaun planeia Orsamentu Estadu ba 2017 ho forma "realista", liliu tamba sei iha eleisaun rua iha tinan oin mai.



"Tantu ba polítiku sira hanesan moos burokrata tenki planea ho forma realista gastu orsamentál", afirma Rui Maria de Araújo iha arranke ba jornada debate ida kona-ba konta públiku ba 2017.

"Ita tenki determina no planea ho realístiku no labele iha ambisaun maka'as liu ba iha atividade Governu nian", nia afirma.

Rui Araújo rekorda katak iha 2017 sei iha eleisaun lejislativu no prezidensia ne'ebé bazeia ba esperiênsia nasaun nian hatudu katak aktu eleitorál iha impaktu ba ezekusaun orsamentál.

Iha 2007 no 2008, rekorda katak, Timor-Leste iha " orsamentu ida boot" maibé "problema iha qualidade no iha nível ezekusaun" no iha 2012 "moos mosu difikuldade iha ezekusaun", nia rekorda.

Debate iha ohin, ne'ebé hala'o iha Salão Nobre do Ministério dos Negócios Estrangeiros, hakarak define loloos liña jerál, prioridade nasional no envelope fiskál no tetu ba gastu Orsamentu iha 2017 nian.

Jornada debate ne'e konta ho prezensa maioria hosi parte Governu, deputadu balun, diretór nasional, responsável instituisaun no ajénsia públika no representante sosiedade sivil no parseiru dezvoltamentu.

Iha primeiru debate ne'e prosesu alargadu ne'ebé, esplika Rui Araújo, sai hanesan pontu altu apresentasaun Governu nian ba Parlamentu, iha 18 outubru, ba iha Orsamentu Estadu 2017 nian.

Orsamento 2016 ninia lala'ok, iha inísiu tinan ne'e, hetan veto hosi presidente Repúblika, Taur Matan Ruak, ne'ebé ikus mai ketan aprovadu fila fali hafoin segundu votu ho unanimidade iha Parlamentu Nasional.

SAPO TL ho Lusa

Tetun

Timor-Leste bele hetan bankarota iha 2035 laho reforma ekonómiku sira - Governu

16 de Maio de 2016, 23:58

Estadu timoroan bele hetan bankarota iha 2035, bainhira uza hotu rekursu sira hosi nia Fundu Petrolíferu, bainhira laiha polítika adisional sira reforma nian no diversifikasaun ekonómiku no kontensaun maka'as iha despeza sira, haktuir hosi Ministériu Finansa.



Konta sira ne'ebé apresenta ona iha Jornada Orsamental sira ne'ebé hala'o iha loron-segunda ne'e iha Díli no marka inísiu hosi prosesu debate nian - ho Governu, setór públiku no sociedade sivil - pa preparasaun hosi Orsamentu Estadu 2017 nian.

Responsável sira hosi Ministériu Finansa analiza ona, to'o agora, komportamentu hosi Fundu Petrolíferu (FP), previzaun sira iha reseita sira no retornu iha tinan hirak tuirmai no impaktu iha situasaun fiskal nasaun nian.

Tuir previzaun ne'e - ne'ebé hanoin de'it ba esplorasau petrolíferu nian ne'ebé halo daudaun, kuaze iha faze ikus nian - bainhira nível despeza nian sei mantén, ativu sira hosi FP sei tuun neinek iha tinan hirak tuirmai, no hotu iha 2035.

"Informasaun sira hatudu katak bainhira laiha mudansa no reforma sira, Estadu sei hetan falénsia iha tinan 2035, afirma hosi primeiru-ministru Rui Maria de Araújo.

FP, ne'ebé harii iha 2005, hanesan fonte prinsipal hosi reseita públiku sira, ho Governu ultrapasa regularmente limiti másimu hosi sustentabilidade hosi intrumentu "poupansa" nasional nian.

Iha fulan-Marsu nia rohan, FP iha ona dólar millaun rihun 16,5, metade investe iha tusan soberanu norte-amerikanu nian, 40% iha asaun global sira no 10% iha tusan soberanu hosi nasaun sira seluk.

Iha total, no hahú hosi 2005, reseita petrolíferu sira hatama ona iha kofre timoroan sira dolar millaun rihun 21,1, ho FP rejista retornu médiu anual ida ho 3,9%.

Saldu atuál iha relasaun ho reseita petrolíferu millaun 21.063, iha liu retornu iha investimenu ho millaun 2.925 no levantamentu ho millaun 7,409.

FP tinan-tinan aumenta nafatin entre 2005 (bainhira iha ativu sira ho folin dólar millaun 371) no 2014. Iha 2015 tuun hosi 16.539 ba dolar millaun 16.218, no aumenta fali iha trimestre dahuluk tinan nian ba millaun 16.578.

Retornu anual mós hanesan pozitivu nafatin to'o 2014. Iha tinan liubá maka -0,1%.

Retornu aas liu rejista iha tinan 2007 (7,4%) no tuun liu iha tinan 2009 (0,5%).

Estratéjia hosi Ministériu Finansa kontinua iha kombinasau risku no potensial maka'as kresimentu nian liuhosi asaun sira, ho "protesaun kapital" liuhosi título sira tusan públiku nian (60%).

Maibé, no tuir análise hosi Ministériu Finansa nian, senáriu maka ohin loron hanesan negativu liu duké pasadu, haree hosi kritériu sira hanesan folin sira hosi petróleu brutu, retornu iha investimentu no levantamentu sira.

Bainhira iha pasadu FP fó benefísiu hosi fatór pozitivu boot ida, ohin loron kritériu sira ne'e hanesan negativu sira: folin petróleu brutu nian, produsaun, taxa juru sira no levantamentu sira.

Iha meza debate iha alterasaun sira hodi aumenta no diversifika senáriu ekonómiku, hodi buka tan reseita la'ós petrolíferu nian no ba reforma sira iha gastu Estadu nian.

Análize ne'ebé apresenta iha loron-segunda ne'e hatudu variasaun maka'as iha taxa sira ezekusaun orsamental nian, ho tinan sira eleisaun nian no tinan sira tuirmai (2007 no 2008 no 2012 no 2013) ne'ebé rejista taxa ki'ik sira.

Hanesan ezemplu, iha 2007, nia ezekusaun maka 55% no iha tinan tuirmai maka 61%. Iha 2012, ezekusaun tuun hosi 84% iha tinan anterior ba 66%, folin ne'ebé repete iha 2013, hodi aumenta fali hahú tinan 2014.

Tinan ne'e, no haktuir hosi informasaun sira ne'ebé apresenta iha loron-segunda ne'e, ezekusaun loloos maka iha loron 05 Maiu hosi 22%, kompromisu sira maka 12% no abrigasaun sira maka 10%.

ho Lusa

[Kona-bá](#) [Kondisaun Utilizasaun](#) [Política Privacidade](#) [Kona-bá Cookie](#) [Tulun](#)
[SAPO](#)

Produsaun hosi [SAPO](#) - Ho direitu hotu-hotu rezervadu.

Tetun

Ministériu Finansa propoin tetu máximu ho gastu 1,2 MMD ba 2017

17 de Maio de 2016, 10:31

Ministériu Finansa propoin horisehik máximu gastu hamutuk dólar rihun millaun 1,2 iha Orsamentu Estadu 2017, opsaun ne'ebé karun liu tolu ne'ebé apresenta ona, ne'ebé implika levantamentu significativu hosi Fundu Petrolíferu.



Helder Lopes, vise-ministru Finansa, apresenta iha Jornada Orsamentál nian, iha elenku governativu barak nia oin, deputadu no responsável públiku timoroan sira, senáriu ba tetu fiskál tinan oin nian.

Halo konta sira bazeia ba projesaun reseita no levantamentu hosi Fundu Petrolíferu hosi Rendimentu Sustentável Estimadu (RSE), ka valór ne'ebé permitie atu la book kapitál fundu ne'e rasik maibé iha de'it nia rendimentu.

Senáriu ne'e baratu liu "maibé mós difísil liu" relasiona ho despeza ne'e limita orsamentu ho de'it dólar millaun 702, soma loloos hosi previzaun reseita la'ós petrolífera ho tan RSE.

Iha segundu senáriu, tetu fiskál sa'e ba dólar rihun millaun buat ne'ebé implika nesesidade adisionál ho dólar millaun 317, ne'ebé bele hetan ka levantamentu maka'as hosi Fundu Petrolíferu ka hosi empréstimu.

Finalmente, iha senáriu ne'ebé boot liu, Ministériu Finansa propoin tetu máximu rihun millaun 1,2, buat ne'ebé implika levantamentu adisionál (ka empréstimu) ho valór dólar millaun 517 resin.

Helder Lopes defende katak Governu tenke asume postura konservadora, rekorda katak, iha pasadu, Governu ho Parlamentu Nasionál aprova orsamentu liu hosi rekomendasaun tetu máximu maibé, depois, la konsege ezejuta.

Hanesan kazu 2012, ia hatete, bainhira Ministériu Finansa rekomend tetu máximu rihun millaun 1,2, Orsamentu ne'ebé aprova hamutuk rihun millaun 1,8 maibé ezejuta de'it rihun millaun 1,19.

Iha tinan kotuk, iha parte seluk, Finansa rekomenda rihun millaun 1,3 hosi tetu orsamentál, valór finál aprova hamutuk rihun millaun 1,57 maibé ezejuta de'it rihun millaun 1,32.

Intervein iha debate ne'e, primeiru-ministru Rui Araújo afirma katak natoon ba Estadu hotu "halo dieta maibé kontinua kumpre servisu" ne'ebé sidadaun sira presiza.

"Ita redús gastu, maybe ita tenke kontinua apresenta rezultadu. Ne'e la'ós problema Ministériu Finansa nian, ne'e problema Estadu hotu nian", nia afirma.

Governante ne'e rekorda katak iha 2017 sei iha eleisaun no, tradizionalmente, iha tinan sira votu nian no iha tinan tuir mai, kapasidade hodi ezejuta orsamentu tun, aspetu ne'ebé tenke inklui iha debate konta públika nian.

Nia hatete sai "realista", buka hatán ba objetivu sira Estadu nian, maybe mós "kontestualiza frakeza sira", inklui kapasidade hodi ezejuta valór orsamentu no halo ho qualidade.

Debate horisehik nian, ne'ebé hala'o iha Salaun Nobre Ministériu Negósiu Estranjeiru hakarak defini liña jerál, prioridade nasional no envelope fiskál ho tetu gastu Orsamentu 2017 nian.

Jornada debate ne'e konta mós ho prezensa parte boot Governu nian, deputadu barak, diretór nasional sira no responsável instituisaun no ajénsia públika sira, representante sira hosi sociedade sivil no parseiru dezenvolvimentu.

Ne'e hanesan primeiru debate boot hosi prosesu ne'ebé Rui Araújo esprika sei sai hanesan pontu aas apresentasaun hosi Governu ba Parlamentu, iha 18 outubru, Orsamentu Estadu 2017.

SAPO TL ho Lusa

[Kona-bá](#) [Kondisaun Utilizasaun](#) [Polítika Privasidade](#) [Kona-bá Cookie](#) [Tulun](#)
[SAPO](#)

Produsaun hosi [SAPO](#) - Ho direitu hotu-hotu rezervadu.